

漢魏六朝百三家集

梁

沈隱侯

第七十三冊

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

6.73-76

疏

修定樂書疏

竊以秦代滅學樂經殘亡。至於漢武帝時河間獻王與毛生等共採周官及諸子言樂事者以作樂記。其內史丞王定傳授常山王禹。劉向校書得樂記二十三篇。與禹不同。向別錄有樂歌詩四篇。趙氏雅琴七篇。師氏雅琴八篇。龍氏雅琴百六篇。唯此而已。晉中經簿無復樂書。別錄所載已復亡逸。按漢初典章滅絕。諸儒捃拾溝

渠牆壁之間浮片簡遺文與禮事相關者卽編次以爲禮記。皆非聖人之言。月令取呂氏春秋。中庸表記緇衣皆取子思子。樂記取公孫尼子。檀弓殘雜。又非方幅典誥之書也。禮記是行已經邦之功。故前儒不得不補綴以備事用。樂書事大而用緩。自非逢欽明之主。制作之君。不見詳議。漢氏以來主非欽明。樂旣非人臣急事。故言之者寡。陛下以至聖之德應樂推之符。實宜作樂崇德。殷薦上帝。而樂書淪亡。尋案無所。宜

選諸生分令尋討經史百家凡樂事無大小皆別纂錄仍委一舊學撰爲樂書以起千載絕文。定大梁之樂使五英懷慚六莖興愧。

論譜籍疏

晉咸和初蘇峻作亂文籍無遺後起咸和二年以至於宋所書並皆詳實並在下省左戶曹前廂謂之晉籍有東西二庫此籍旣並精詳寔可寶惜位宦高卑皆可依案宋元嘉二十七年始以七條徵發旣立此科人姦互起僞狀巧籍歲

月滋廣以至于齊患其不實於是東堂校籍置
郎令史以掌之兢行姦貨以新換故昨日卑細
今日便成士流凡此姦巧並出愚下不辨年號
不識官階或注隆安在元興之後或以義熙在
甯康之前此時無此府此時無此國元興唯有
三年而猥稱四五詔書甲子不與長厯相應校
籍諸郎亦所不覺不才令史固自忘言臣謂宋
齊二代士庶不分雜役減闕職由於此竊以晉
籍所餘宜加寶愛。

議乘輿升殿疏

正會儀注御出乘輿至太極殿前納舄升階尋
路寢之設本是人君居處不容自敬宮室按漢
氏則乘小車升殿請自今元正及大公事御宜
乘小輿至太極階仍乘版輿升殿

爲文惠太子禮佛願疏

維年月朔日皇太子某稽首和南十方諸佛一
切賢聖夫至理可祈必憑誠于正覺極妙有感
乃歸仰于真如然後取證現前獲驗茲日去歲

皇帝暫虧御膳，小廢乾行，四海震惶，百司戰悚，諱厯劫多幸，夙世善緣，忝生王家，叨守儲嗣，臣子心地，倍用焦迫，禁門旦啓，欣問豎之安，寢扉早闢，訪饁夫之宰，祇樹獨園，伏膺下拜，伽藍精舍，繞足頂禮，百神警衛，萬福具臻，曾不信宿，聖躬和愈，豈非三寶之弘慈，十號之法力，旣而天從心欲，誠願克果，今于崇正殿奉還法會，千僧仍留百僧，八關行道，又度二士，同日出家，惟願藉此功德，奉資皇帝陛下，壽與南山共久，年將

北極俱長。道懋農軒。德高堯舜。上界八萬之劫。可期。下方七百之祚。未擬。元良之位。長守膝下之懽。上嗣之所。永保懷袖之愛。以茲法田。奉中宮皇后殿下。福履攸善。無思不屆。天母之德。厚載不能加。任姒之盛。坤儀甯足匹。未及諸王妃主宮掖嬪房。未來因緣。過去眷屬。並同茲辰。預此慈善。又普爲積苦餓鬼。受臯畜生。三途八難。六道十惡。水陸蠢動。山藪翺飛。濕生化生。有想無想。皆藉今日慈悲。咸遙浣濯。人天攝受。幽顯

證明、庶憑衆力、共相津濟、謹疏

爲文惠太子解講疏

皇太子以建元四年四月十五口集大乘望僧
於玄圃園、安居、寶地、禁苑、皆克供具、珍臺綺榭
施佛及僧、震立音於六宵、暢微言於永劫、三達
宣其妙果、十住讚其祥緣、踐二氣而業升、離九
旬而功就、暨七月旣望、乃敬捨寶軀、爰及輿冕
自纓已降、凡九十九物、願以此力、普被幽明、帝
室有嵩華之固、蒼黔饗仁壽之福、若有淪形苦

海得隨理悟、墜體翔塗、不遠斯復、十方三世、咸證伊言、茲誓或騫、無取正覺、

爲齊竟陵王發講疏

并頌

大矣哉、妙覺之爲妙也、無相非色、空不可極、而立言垂訓、以汲引爲方、慈波慧水、雖可漑而莫知其源者也、靈篇寶籍、遠探龍藏、蓋無得而言焉、至於義指天山之表、文隱交河之外、又非斷籌所能算也、逮于祇樹菴園之妙吼、四諦一乘之正說、重譯而通中土、莫不恒沙之一焉、而詞

源海廣、理塗靈輿、雖字流附響、萬軫同起、分條散葉、離文折句、未或暨其萬一也、竟陵王殿下、神超上地、道冠生知、樹寶業於冥津、凝正解於冲念、若夫方等之靈邃、甘露之深玄、莫有不遊其塗而啓其室也、秘藏之被東國者、靡不畢集、皆繕以寶縑、文以麗篆、凝光瓊笥、炫彩瑤牋、思欲敷震微言、昭感末悟、乃以永明元年二月八日、置講席於上邸、集名僧於帝畿、皆深辨真俗、洞則名相、分微靡滯、臨疑若曉、同集於邸內之

法雲精廬演玄音，千六霄啓法門。千載濟濟
乎實曠代之盛事也。自法王已降，暨於聽僧條
載如左，以記其事焉。乃作頌曰：
十號神寂，三達空玄。迹由聖隱，教以慈宣。
氤氲緒法，昭晰遺筌。標聲妙住，騰華寶蓮。
文摘龍藏，義溢中天。惟王稟照，道冠增璿。
星羅寶幄，雲開梵筵。思馳春馬，理折秋蟬。
靈場絢彩，正水興蓮。乘茲上果，永導芳緣。

爲齊竟陵王解講疏

大憑形輝化、必由委氣之途、因方導理、必同肖天之質、是以表靈邃瑞、誕聖王宮、駐彩辰緯、停華日月、故能積慈成聖、累妙成空、坦照路千道、揚拔迷根、干苦岸、弟子蕭子良、滌盥煩襟、栖情正業、肅萃僧英、敬敷慧典、密藏奧文、雲開雨散、今魄首丹達、日弦上朔、止步凝想、空明屬念、雖神迹稍緬、而遺塵在茲、乃飾筵藻殿、張帷盛邸、絜誠祇事、建斯寶集、蘭泉波涌、芳藹雲迴、秘理探微、玄况悠邈、宗條旣舉、窮功允就、論堂卷座、

義鼓停音，乘此芳緣，將升上住，十方三世，有證無爽。

又

夫妙極衆象，湛思必通，理冠羣友，有感斯應，自鸞音輟唱，圓光寢輝，委華之相不傳，踊地之符已遠，行言入道，事難於造次，一悟階空，効隔於俄頃，若非積毫成仞，累燭爲明，無以方軌慧門，維舟法岸，弟子是用夕惕載懷，惟日不足者也。故敬集名僧，演敷奧籍，震微起滯，輪動雲廻，月

殿舍呂魄弦上日，甘露旣窮，輟言寶座，卷文罷
席，衣屣相趨，仰惟先后，稟靈娥德，叶景軒度，道
載華嶽，化洽汾陰，早棄蘭宮，夙違椒掖，千乘不
追，萬鍾靡及，終天之慕，不續於短年，歆報之誠，
思隆于永劫，敬捨軀服，以克供施，藉此幽通，控
情妙覺，仰願聖靈，速登寶位，越四天之表記，十
號之尊，惟茲三世，咸證于此，敢誓丹衷，庶符皎
日。

爲南郡王捨身疏

弟子蕭王上白諸佛世尊道德僧衆夫色固無
象觸必歸空三世若假八微終散雖復迴天震
地之威窮於寂滅齊冠楚組之麗靡救埃壤而
嗜慾易繁每疚心術捨施難弘用迷假照弟子
樹因曠切嚮報茲生託景中璇聯華日彩玉組
夙紆蕃麾早建蘭池紫燕之乘擾於外閑黼帳
翠帷之飾光於中寢徒以心源尚滯情路未昭
識謝兼忘理慚獨悟不能叶調五氣綏御六神
霜暑或愆風露時舛是以敷襟上實栖誠妙覺

敬捨肌膚之外，凡百一十八種，當令經衛風理，
府絡時順，萬祉雲翔，百妖窮滌，望北極而有恒，
瞻南山而同永。又願宸居納祐，則天均慶，少陽
介福，儼日承休，儲妃闈膺祥之符，皇枝廣惟祺
之祚，敬飾崇薨，嚴置寶幄，仰延息心，旁旅清信，
勗茲弘誓，證其幽疑，庶可以感降禎和，招對靈
應，玄塗匪昧，要之無爽。

捨身願疏

優婆塞沈君敬白，十方三世諸佛本師釋迦如

來安養阿彌陀世尊

云

云

一切衆聖今日道俗

諸大賢德夫形非定質衆緣所聚四微不同風
火亦異析而離之本非一物燕肝越膽未足爲
譬靜念求我無時可得而積此淪昏生生不已
一念儻值曾未移時障習相蕩旋迷厥路橫指
空呼名之爲有豐已傷物日夜靡休蓄身外之
財以克其慾攘非已之分用成其侈豈直溫肌
啗腹若此而已哉至於積篋盈藏未嘗登體溢
俎充庖旣飫斯棄曾不知粟帛所從事非因已

悠悠黔首、同有其分、離多共寡、猶或未均、我若有餘、物何由足、仁者之懷、不應若此、侵他之財、世稱爲盜、盜之甚者、孰過於斯、幽顯推求、無一或可、君仰藉時來、久乘休運、玉粒晨炊、華燭夜炳、自此迄今、厯年三十、遂乃服冕榮國、裂土承家、潤盈身已、慶流僕妾、室非懸磬、俸有兼金、救寒止於重裘、而筭委餘糞、冬夜旣蒙累璽、而積有贏衾、自斯已上、侈長非一、雖等彼豪家、其陋已甚、方諸窶室、所邁寔多、悟此非常、事由諸佛、

有懷捨散、宜光道場、饑寒困苦、爲患乃切、布滿
州縣、難悉經緣、其當稱力因事、一旦隨年、頭目
髓腦、誠難輕慕、虧已贍物、未易頓行、誓欲廣念
深恩、積微成著、施路檀門、冀或能踐、以大梁天
監之八年、年次立梏日、殷鳥度、夾鍾紀月十八、
在於新所、創蔣陵皇宅、請佛及僧、髣髴祇樹、息
心上士、凡一百人、雖果謝菴園、飫非香國、而野
粒山蔬、可同屬饜、兼捨身資服、用百有一十七
種、微自損撤、以奉現前衆僧、夫室家患苦、刀俎

非切制除蕭散形質超然蠢彼羣生咸有佛性
不因剪削此路莫由緣業舛互世諦煩記變形
改飾卽事爲難故闢以八支導彼清信一日一
夜同佛出家本弘外教事非僧法而世情乖舛
同迷斯路招屈名僧寘之虛室主人高卧取逸
間堂呼爲八關去之實遠雖有供施之緣而非
斷漏之業約今謹自卽朝至于明旦排遣俗累
一同善來分畱上德勗成微志藉此輕因庶證
來果功德之言非所敢及

表

上宋書表

臣約言臣聞大禹刊木。事炳虞書。西伯勘黎。功
煥商典。伏惟皇基積峻。帝烈弘深。樹德往朝。立
勲前代。若不觀風唐世。無以見帝嫺之美。自非
覩亂秦餘。何用知漢祖之業。是以掌言未記。爰
動天情。曲詔史官。追述大典。臣實庸妄。文史多
闕。以茲不才。對揚盛旨。是用夕惕。載懷忘其寢
食者也。臣約頓首死罪。竊惟宋氏南面。承歷統

天雖世窮八主年減百載而兵車亟動國道屢屯垂文簡牘事數繁廣若夫英主啓基名臣建績拯世夷難之功配天光宅之運亦足以勒銘鐘鼎昭被方策及虐后暴朝前王罕二國釁家禍曠古未書又可以式規萬葉作鑒于後宋故著作卽何承天始撰宋書草立紀傳止於武帝功臣篇牘未廣其所撰志唯天文律厯自此外悉委奉朝請山謙之謙之孝建初又被詔撰述尋值病亡仍使南臺侍御史蘇寶生續造諸傳

元嘉名臣皆其所撰。寶生被誅。大明中又命著作郎徐爰踵成前作。爰因何蘇所述。勒爲一史。起自義熙之初。訖於大明之末。至於臧質魯爽。王僧達諸傳。又皆孝武所造。自永光以來。至於禪讓十餘年內。闕而不續。一代典文。始末未舉。且事屬當時。多非實錄。又立傳之方。取捨乖衷。進由時旨。退傍世情。垂之方來。難以取信。臣今謹更創立。製成新史。始自義熙肇號。終於昇明三年。桓立譙縱。盧循馬魯之徒。身爲晉賊。非關

後代吳隱謝混郗僧施義止前朝不宜濫入宋
典劉毅何無忌魏詠之檀憑之孟昶諸葛長民
志在興復情非造宋今並刊除歸之晉籍臣遠
愧南董近謝遷固以閭閻小才述一代盛典屬
辭比事望古慙良鞠躬跼蹐覲汗亡厝本紀列
傳繕寫已畢合志表七十卷臣今謹奏呈所撰
諸志須成績上謹條目錄詣省拜表奉書以聞
臣約誠惶誠恐頓首頓首死罪死罪

上注制旨連珠表

竊尋連珠之作。始自子雲。放易象論。動模經誥。
班固謂之命世。桓伊以爲絕倫。連珠者。蓋謂辭
句連續。互相發明。若珠之結排也。雖復金鑣互
騁。玉軟並馳。妍媸優劣。參差相間。翔禽伏獸。易
以心威。守株膠瑟。難與適變。水鏡芝蘭。隨其所
遇。明珠燕石。貴賤相懸。

爲柳世隆上銅表

夫幣以周務。貨以賑民。阜國康治。莫尚乎此。周
氏致平。始於圜法。漢世幾措。資於貫朽。名鑪化

沙隱集 卷一
金良工盡藝方將盈金中藏收功上苑南楚陋
其方府西京鄙其部內

上建闕表

恭惟哲后舊章必修眇矚前王復古爲貴伏惟
陛下欣咨故實率由令典昔在有晉經創江左
邦訓莫釐遠圖多缺萬雉之外兩觀弗興空指
南峰懸法無所世厯三代年將二百非所以經
世成務垂業後昆天德圓應憲章自遠宜詔匠
人建茲象闕俯藉愛禮之心以申子來之願式

表端闡儀刑萬國使觀風而至復聞正歲之典
遐想之士少寄懷古之目。

爲柳兗州世隆上舊宮表

舊宮蘊靈千古合祥百代萬祇相祉八神警室
事超齊甸義邁譙宮故能屬輦道於天階命帝
闕於霄路實宜樹闕疏壤寫極上窮克播微塵
永光盛烈

舉胡元秀表

竊惟經邦御遠雖待大賢摧鋒犯鏑亦資小用

伏見錢塘新城主胡元秀早歲驅馳意幹強果
矛盾之用氣凌百夫若置之六師之間處之一
旅之上必能前奮獷敵却沮強胡臣實弱懦不
窺武節昧罔輕言伏懷悚懼

薦劉粲表

陛下則天開業冠帶要荒輶軒韋轂交軫於遐
路捨築投竿相望於魏闕或以開坼未採管庫
遺賢執戟忘疲倚輶不息

與沈淵薦沈麟士表

吳興沈麟士英風夙挺。峻節早樹。貞粹稟於天
然。綜博生乎篤習。家世孤貧。藜藿不給。懷書而
耕。白首無倦。挾琴採薪。行歌不輟。長兄早卒。孤
姪數四。攝匭鞠稚。吞苦推甘。年踰七十。業行無
改。元嘉以來。聘召仍疊。玉質踰潔。霜操日嚴。若
使聞政王庭。服道槐掖。必能孚朝。規於邊鄙。播
聖澤於荒垂。

爲柳世隆讓封公表

臣聞懸旌玉塞。貳師尚黜其功。伐鼓炎州。伏波

猶懼其賞。徒以兼委之施。或難固辭。抽心之情。
必無雙奪。是故俛容青閣。願還慈於裂壤。竊步
丹墀。希收寵於開賦。昔竄命窮雉。難迫勢孤。沈
板未難。負戶非切。及顧溫清之館。懼結尊慈之
懷。累葉喁喁。舉門惴惴。臣事逼君親。理非外獎。
實賴朝謨。謹肅宰畧。遐震奔鯨外剿。臣何力焉。
幸得扶老携弱。重出幽堵。還軸歸驂。再踐鄉路。
豈可資國青。以邀其功。因衆功而饗其報。遂使
甘霜受電之心。有同於飾。請皎日大河之志。匪

殊於貌謁

爲褚炫讓吏部尚書表

竊惟玄素未辨、必謬朱紫之察、規矩或昧、理喪
方圓之功、東西兩漢、左雄孤絕於前、南北二才
山濤莫嗣於後、良由性藏於貌、外隱乎心、楚越
無以況其迥殊、山川未足方其險阻、雖復挫暗
爲明、勉愚生智、亦何以登竒、援異、離渭分涇、

爲南郡王讓中軍表

臣聞建侯茂則、非賢罔樹、分噐鴻典、惟懿實先、

而臣挹道未弘。踐義多缺。徒升國葬。空襲宸寵。
光珪華組。掩藹于關。垂令采微。猷寂寥於旬表。
晨仲委帶。夕軫臨顏。皇衢肇啓。鼎運始資。魯衛
兼啓。義邈周年。齊楚並建。禮高漢日。臣以末第
聯輝上序。祐履荆阿。懷璽夢曲。拊志惟熏。佩握
如擣。

爲始興王讓儀同表

徒塵翠渥。方降紫泥。以茲上令。用隔下情。况高
擬萬石爰均八命。室等天潢。服加黼黻。出則高

陪千乘入則仰司百揆陛下道苞九舜明出十堯萬微必理一物興念有紆玄鏡暫垂止水

讓僕射表

臣聞役壯休老上典所優晨行暮息事身恒分若夫玄黃未已非秋駕之衛筋力爲用豈強飯之時養老杖鄉抑推前典服戎告謝親學匪任宿肉極其虛憊歲制防其不辜寔所以蠲假衰疾收屏淪暮。

讓五兵尚書表

臣聞百合之趙非宿春所資千里之越豈一葦
能泝何者裝輕適於路遠并弱疲於濟深醜貌
悴容不藉鑒於淄水驚足蹇步終取躓于鹽車

爲皇太子謝表

臣實蒙稚溫文以闕不閑三善之訓未習四學
之儀雖問安內豎因心自發而視膳寢門未任
再至乃降皇慈夙膺盛典貳體宸極守器宗祧
顧循幼志如臨冰壑

爲長城公主謝表

奉策書封妾爲長城縣公主。徽命降臨，慙腴安
寘。妾膺靈稟氣，育景璇閨。弱志易淪，柔德難樹。
雖復式修姆保，莫敢或遑。而肅雍不著，穠華蓋
闕。不悟宸暉曲漸，藝章夙賁。籍此恩加，遽延典
策。湯沐光啓，珩琚昭被。

謝封建昌侯表

陛下投袂萬里，拯厥塗炭。臣雖心不吠堯，而迹
淪桀犬。此則王業始基，臣所不與。徒荷日月之
私，竟無蒸燭之用。天命玄鳥，非止今日。受命作

周其來久矣。雖復備數樂推。與同謳頌。而誠微
弱草效闕織塵。遂班山河之誓。叨佐命之賞。亦
何以慰悅帷帳。酬報爪牙。

謝母封建昌國太夫人表

伏見詔書以臣母封爲建昌國太夫人。慶溢蓬
門。榮流素族。恭荷屏營。罔識攸寘。臣稟訓私閨。
志塗靡立。勉以爲義。誠有由然。輸力致身。曾無
萬一天慈。罔已。至德彌光。探兵私志。降此洪澤。
榮親之至。始自微臣。率斯道也。方流萬物。草卉

輕命固莫云酬

到著作省謝表

臣約言卽日被召以本官兼今職臣藝不博古
學謝專家乏懷鉛之志慙夢腸之術聯事乖善
握蘭慚良謬勒斷蛇之符預刊氷河之業路遙
難騁才弱未勝而神工曲造雕絢彌疊珥筆史
觀記言文府趨奉載揚腆膺交顏

拜尚書令到都謝表

竊位之譏允當斯責王命私請有事相傾油雲

湛、露、徒、降、旻、昊、之、德、弱、綽、輕、蟬、不、載、邱、嶽、之、重、
登、階、望、席、恍、焉、失、步、

謝立皇太子賜絹表

臣聞重離在天，八紘之所共仰。明兩作貳，萬國
所以咸甯。太子體岐弱載，表睿冲茂。典冊旣升，
休祚方遠。率土含歡，遐邇均忭。天情載洽，慶賜
必周。幣帛嘉貺，猥班庸劣。

謝賜新曆表

竊惟觀斗辨日，馭生爲本。審時分地，稼政莫先。

何則勝殺無舛拘忌之理難忽珠璧有徵禮節之原攸序

致仕表

徒以桑榆無幾時制行及不朝之禮忽在今辰使反身敝廬待終窮巷臣又聞之懸車散髮其來舊矣昔廣德請骸義在量力二疎知止懼貽後悔數年以來稍就盡竭氣力衰耗不自支持若蒙天地大恩造物洪施拯其隆滿之切救其害盈之災譬彼日昃假榮終朝踟躕夕景少觀

盛化宅壤歸泉。自無云幾。祈仁仰澤。事止寸陰。

臨終遺表

臣約言臣抱疾彌留。迄今卽化。形神欲離。月已
十數。窮楚極毒。無言以喻。平日健時。不言若此。
舉刀坐劒。比此爲輕。仰惟深人法門。厲茲苦節。
內矜外恕。寔本人情。伏願聖心。重加推厲。微臣
臨途。無復遺恨。雖慚也善。庶等鳴哀。

章

爲安陸王謝荊州章

臣托景宸區、早延休寵、身班帝穆、爵首藩圭、好
禮慚河、敦詩愧楚、懸旆出關、徒違絳闕、挺金入
濟、識謝戎麾、而照臨彌廣、復叨匪服、紀南形勝、
任總上游、西緯岷邛、北維嶠峽、六轡在手、猶或
稱難、羣牧稟威、茲道孰易、是以摠情陸白、布款
幄垂、霄途嚴遠、事隔披照、腆冒斯顏、膺此謬荷、
祇奉兢懼、罔知攸記、

爲晉安王謝南兗州章

臣以菜孱、幼無秀業、依天宅照、藉海憑瀾、王爵
早加、藩麾宿樹、進不能閑、詩西楚、好禮北河、退
無以振采六條、宣風萬里、懷慙起懼、載溢心顏、
而皇明輝燭、照被彌遠、遂乃徙旆淮區、遷金濟、
服朱驂、出邸青組、臨方瞻惟、徵寵俯仰、忘厝

爲六宮拜章

蓬閨菲質、嘉淑無筭、越自幽衡、登軀宸漢、奉日
月之華、侍巾屣之末、何以厠鴛鸞之盛序、奉屬

車之清塵

沈隱侯集

卷一

章

五

沙隱集

卷一

三

彈文

奏彈王源

給事黃門侍郎兼御史中丞吳興邑中正臣沈
約稽首言臣聞齊大非偶著乎前誥辭霍不婚
垂稱往烈若乃交二族之和辨伉合之義升降
宸隆誠非一揆固宜本其門素不相奪倫使秦
晉有匹涇渭無舛自宋氏失御禮教彫衰衣冠
之族日失其序姻婭淪雜罔計廝庶販鬻祖曾
以爲賈道明目腆顏曾無愧畏若夫盛德之肩

世業可懷，樂卻之家。前徽未遠，既壯而室。竊貲
莫非阜隸，結褵以行。箕帚咸失其所，志士聞而
傷心。舊老爲之歎息，自宸厯御寓，弘革典憲，雖
除舊布新，而斯風未殄。陛下所以負宸興，言思
清敝俗者也。臣實懦品，謬掌天憲，雖埋輪之志
無屈權右，而狐鼠微物，亦蠹大猷。風聞東海王
源嫁女與富陽滿氏，源雖人品庸陋，胄實參華。
曾祖雅位登八命，祖少卿內侍帷幄，父璿升采
儲闈，亦居清顯。源頻叨諸府，戎禁預班，通徹而

託姻好唯利是求玷辱流輩莫斯爲甚源人身
在遠輒攝媒人劉嗣之到臺辨問嗣之列稱吳
郡滿璋之相承云是高平舊族寵奮肩胄家計
溫足見託爲息鸞覓婚王源見告窮盡卽索璋
之簿閱見璋之任王國侍郎鸞又爲王慈吳郡
正閤主簿源父子因共詳議判與婚璋之下錢
五萬以爲聘禮源先喪婦又以所聘餘直納妾
如其所列則與風聞符同竊尋璋之姓族士庶
莫辨滿奮身殞西朝肩嗣殄沒武秋之後無聞

東晉其爲虛託，不言自顯。王滿連姻，實駭物聽。潛楊之睦，有異於此。且買妾納媵，因聘爲資。施衿之費，化充牀第。鄙情贅行，造次以之。糾慝繩違，允茲簡裁。源卽罪主，臣謹案南郡丞王源，忝藉世資，得參纓冕。同人者貌，異人者心。以彼行媒，同之抱布。且非我族類，往哲格言。薰不蕪雜，聞之前典。豈有六卿之胄，納女於管庫之人。宋子河魴，同穴於輿臺之鬼。高門降衡，雖自己作。喪祖辱親，於事爲甚。此風弗翦，其源遂開。黜世

塵家將被比屋宜寘以明科黜之流伍使已汚之族永愧於昔辰方媮之黨革心於來日臣等參議請以見事免源所居官禁錮終身輒下禁止視事如故源官品應黃紙臣輒奉白簡以聞

奏彈孔稚珪違制啓假事

臣聞禁憲有章士子攸慎守官有典觸網斯及蓋所以崇威闡法下肅上尊謹按廷尉會稽邑中正臣稚珪厯奉朝班頻登要近九棘之任理無休謁冒制干聞實虧恒典恩許雖降所制不

關違犯之條猶合約黜且稚珪俯自內轄作士
下闡通制明文日陳几案自踰規矩莫斯爲甚
臣等參議請以見事免稚珪所居官除中正官
名輒下禁止

奏彈奉朝請王希聘違假

謹按奉朝請臣王希聘幸齒朝班私敬蓋闕休
請有期曾無遄及違弛之譽允膺裁糾臣等參
議請以見事免所居官輒下禁止

奏彈御史孔橐題省壁字慢事

謹按奉朝請臺侍御史臣孔橐淺劣無聞謬列
華省假攝去來仕子常務况東臯賤品非藉豐
資旬日暫勞豈云卑辱而肆此醜言題勒禁省
比物連類非所宜稱黜之流伍寔允朝憲臣等
參議請以見事免橐所居官輒下禁止

奏彈秘書郎蕭遙昌

謹按兼秘書郎臣蕭遙昌盛戚茂年升華秘館
淑慎之迹未彰違情之容已及宜寘徽網以肅
朝風請以見事免遙昌所居官

奏彈王僧佑

僧佑爲太子中舍人、在直屬疾、不待對入、輒去、中丞沈約彈之、

肆情運氣、不顧朝典、揚眉闊步、直轡高驅。

修竹彈甘蕉文

長兼淇園貞幹、臣修竹稽首、臣聞芟蕘蘊崇、農夫之善法、無使滋蔓、剪惡之良圖、未有橐苗害稼、不加窮伐者也、切尋蘇臺前、甘蕉一叢、宿漸雲露、荏苒歲月、擢本盈尋、垂蔭含丈、階緣寵渥、銓衡百卉、而予奪乖爽、高下在心、每叨天功、以

爲已力風聞籍聽非復一塗猶謂愛憎異說所以挂乎嚴網今月某日有臺西階澤蘭萱草到園同訴自稱雖慚杞梓頗異蒿蓬陽景所臨由來無隔今月某日巫岫歛雲秦樓開照乾光弘普罔幽不矚而甘蕉攢莖布影獨見障蔽雖處臺隅遂同幽谷臣謂偏辭難信敢察以情登攝甘蕉左近杜若江蘼依源辨覆兩草各處異列同欵既有證甘羌非風聞切尋甘蕉出自藥草本無芬馥之香柯條之任非有松栢後彫之心

蓋闕葵藿傾陽之識。馮藉慶會。稽絕倫等而得
人之譽。靡卽稱乎之聲。寂寞。遂使言樹之草。忘
憂之用。莫施。無絕之芳。當門之弊。斯在。妨賢敗
政。孰過於此。而不除戮。憲章安用。請以見事。徙
根。翦葉。斥出臺外。庶懲彼將來。謝此衆屈。

賀齊明帝登祚啓

竊惟皇源浚遠帝寶連暉基深慶厚道貫萬葉
而鬱林凶德早樹行悖人經逃聽之所未書宗
廟之殆如綴百靈聳動九服迴遑結后來之望
思庇民之主日月以冀遐邇翹心伏惟陛下大
聖在躬君德夙表龍章日綵煥若麗天納麓賓
門道風遐被睿化神行無思不洽獄訟允歸天
人戴仰屈飛龍之眇轡紆汾陽之遠情運堯心

以臨億兆、敷舜烈以膺寶命、雖中宗之興殷道、
宣后之隆漢德、異世同符、千載一揆、刑措之業、
方遠隆平之基在焉、率土含欣、懷生戴賴、況臣
早蒙覆潤、夙荷恩靈、踴躍外畿、心不勝慶、謹繙
民和式流、皇澤塗歌里、抃載懷鳧藻

上錢隨喜光宅寺啓

伏惟中陽故里、春陵舊居、夷漫滌蕩、曾無遺築、
若使大教早流、法遵二代、開塔白水、樹剎粉榆、
可以傳美垂跡、迄今不朽

送育王像并上錢燭等啓

竊以無名無色、理絕應感、不身卽身、猶觀願力、
惟願燈明道成長、爲八喜之侶、菩提無上、永厠
千子之蹤、

謝賜甘露啓

約言左右徐儼宣勅垂賜法音寺松葉上甘露
臣往年經見、不過霑條而已。時或凝結、纔若輕
霧、未有玉聚珠聯、光粲若是。寔由積仁上通、冥
德下降、故能委華霄極、雰被後彫、慈旨曲洽、頒

此祥賚不任欣荷謹以啓事謝以聞

謝勅賜冰啓

竊惟司寒輟響眇自前代凌室曠官厯茲永久

聖功闡物逸典備甄窮深旣採園池靡用有籍

羔秬無災霜雹

約又有謝賜交州檳榔啓云龍編嘉實厥包遐遠

謝賜軫調絹等啓

霜紈雪委霧縠冰鮮昔劉氏歸國未聞漢儲之
禮曹植還蕃非降魏雨之賜恩逾枉道賁深束

帛

謝勅賜絹葛啓

素采氷華、絺文霜潔、變溽暑於閨閣、起涼風於襟袖、

謝齊竟陵王敎撰高士傳啓

竊聞高尚其事、義光爰象、賢者避世、聲煥典墳、豈徒激貪、勉競、澡身浴德而已、爾乃大弘義訓、百代通風、是以梁鴻、蘇伯、記遠迹於前、叔夜、士安、書高塵於後、雖去取異情、羣畧殊軫、而獨行必彰、片言罔極、貞操與日月俱懸、孤芳隨山壑

共遠明公得一含道體二居宗迹屈巖廊之下
神遊江海之上愛奇商洛訪美東都蓋欲隱顯
齊功出處同致巢由與伊旦並流三辟與四門
共軌肅奉明規思自罄最而曰爾其大哉
謝齊竟陵王示華嚴瓔珞啓
竊以六詩雨散百氏雲興或事止褒刺或義單
小辯莫不雕風煙之氣狀流日月之英華明公
該玄體妙凝神宙表廕法雲於六合揚慧口於
九天因果悟其初心菩提證其後業步無生之

遠岸汎正水之安流。受三遠十號之尊崇。建四
辨八聲之妙極。法身與金剛齊固。常住與至理
俱存。

謝齊竟陵王示永明樂歌啓

鳳綵鸞章。霞鮮錦綉。覲寶河宗。未必比麗。觀樂
帝所。遠有慚德。雖日月在天理。絕稱詠而徘徊。
光景不能自息。

謝竟陵王賚母赫國雲氣黃綾裙襦啓

竊以積絲成綵。散繭騰花。巧擅易水之間。價貴

藁臺之下。民受祿爲養。霑荷彌深。聖恩曲漸。自
葉流根。復袖緼裾。豈伊恒飾榮新之寵。固難輕
報。

謝女出門宮賜絹綺燭啓

桓室金縷。本非所議。孟姬作具。獨若未周。慈澤
曲臨。珍華兼重。製爲美服。隻綺易儔。舉而不息。
三夜有待。

謝司徒賜北蘇啓

廣咀陰山之小。妙色蒲海之東。自非神力所引。

莫或輕至聖。慈普洽遂。遍覓薇。停錫。惜喘。飢引。
道於世務。方駕四衢。又興言於俗表。

爲柳世隆謝賜樂游胡桃啓

挺自禁園。味逾井絡。動物廻祗。在微必應。此乃
胡羯奔逃。吉之先見者也。

爲東宮謝勅賜孟嘗君劍啓

田文重氣。徇名四豪。莫及寶劍雄身。故能威陵
秦楚。人高事遠。遺物足奇。謹加玩服。以深存古
之懷。

爲皇太子謝賜御所射雉啓

輕鑾微動、密翳徐張、黃間所設、矢無虛發、南皮之獲、未足稱工、臣任惟守噐、事隔陪奉、天慈曲降、賜物頒禽、

答釋法雲啓

神本不滅、久所服膺、神滅之談、良用駭惕、近約法師殿內出、亦蒙勅荅、臣下一本、懽受頂戴、尋覽忘疲、豈徒伏斯外道、可以永摧魔衆、孔釋兼

亦自彼諸得眉多累上展具以三也沙糸三

沈隱侯集

卷一

啓

六

書

與徐勉書

吾弱年孤苦，傍無耆屬，往者將墜於地，契濶屯
遭困於朝夕，崎嶇薄宦，事非爲已，望得小祿，傍
此東歸。歲逾十稔，方忝襄陽縣，公私情計，非所
了具，以身資物，不得不任人事。永明末，出守東
陽，意在止足，而建武肇運，人世膠加，一去不還，
行之未易。及昏猜之始，王政多門，因此謀退，庶
幾可果。託卿布懷於徐令，想記未忘。聖道聿興，

謬逢嘉運。往志宿心。復成乖爽。今歲開元。禮年
云至。懸車之請。事由恩奪。誠不能弘宣風政。光
闡朝猷。尚欲討尋文簿。時議同異。而開年以來。
病增慮切。當由生靈有限。勞役過差。總此凋竭。
歸之暮年。牽策行止。努力祇事。外觀傍覽。尚以
全人。而形體力用。不相綜攝。常須過自束持。方
可僊俛。解衣一卧。支體不復相關。上熱下冷。月
增日篤。取煖則煩。加寒必利。後差不及前差。後
剗必甚前剗。百日數旬。革帶常應移孔。以手握

臂率計月小半。分以此推筭。豈能支久。若此不休。日復一日。將貽聖主不追之恨。冒欲表聞。乞歸老之秩。若天假其年。還得乎健才力所堪。惟思是策。

答陸厥問聲韻書

宮商之聲有五。文字之別累萬。以累萬之繁配五聲之約。高下低昂。非思力所學。又非止若斯而已也。十字之文。顛倒相配。字不過十。巧厯已不能盡。何況復過於此者乎。靈均以來。未經用

之於懷抱。固無從得其髣髴矣。若斯之妙。而聖人不尚。何邪。此蓋曲折聲韻之巧。無當於訓義。非聖哲立言之所急也。是以子雲譬之雕蟲篆刻。云壯夫不爲。自古辭人。豈不知宮羽之殊。商徵之別。雖知五音之異。而其中參差變動。所昧實多。故鄙意所謂此秘未覩者也。以此而推。則知前世文士。便未悟此處。若以文章之音韻。同絃管之聲曲。則美惡妍蚩。不得頓相乖反。譬猶子野操曲。安得忽有嘽緩失調之聲。以洛神比。

陳思他賦有似異手之作。故天機啓則律呂自
調。六情滯則音律頓舛也。士衡雖云炳若縹錦。
甯有濯色江波。其中復有一片是衛文之服。此
則陸生之言。卽復不盡者矣。韻與不韻。復有精
麤。輪扁不能言之。老夫亦不盡辨此。

答樂藹書

丞相風道引曠。獨秀生民。凝猷盛烈。方軌伊旦。
懋遺之感。朝野同悲。承當刊石紀功。傳華千載。
宜須盛述。實允來談。郭有道漢末之匹夫。非蔡

伯喈不足以偶三絕。謝安石素族之台輔。時無
麗藻。迄乃有碑無文。況文獻王冠冕彝倫。儀刑
寓內。自非一世辭宗。難或與此。約問開鄙人。名
不入第。歆酬今旨。便是以禮許人。聞命慙顏。已
不覺汗之沾背也。

答沈麟士書

獨往之業。雖聞前載。高塵逸軌。罕或共時。未嘗
不拊袞興懷。望古遐矚。尊賢拔俗。遙然沉冥。自
遠幽貞之操。義高篆策。雖蔣詡不窺城市。鄭真

名動京師。何遠之有名。山既窮。內所豐。百川又
坐臥可對。不出戶庭。而與禽尚齊美哉。約少不
自涯。早愛蟲鳥。逐食推遷。未諧夙願。冀幽期可
托。克全素履。與尊弋釣泉臯。以慰閑幕。則生平
之心於此遂矣。

與范述曾論齊竟陵王賦書

夫眇汎滄流。則不識涯涘。雜陳鐘石。則莫辨宮
商。雖復吟誦環迴。編離字滅。終無所辨。仰酬睿
旨。微表寸長。

與陶弘景書

先生糠粃流俗，超然獨遠，列霓羽帶，總轡雲霞，
方當名書絳簡，身遊玄闕，憑星夕卧，望日朝食，
而至理深微，曖焉難睹，雖欲下風問道，未知厥
路。若夫栖遲閒遠，咀嚙瓊芝，出入清都，師友靈
聖，循崖反跡，無缺惟心。

報王筠書

覽所示詩，實爲麗則，聲和被紙，光影盈字，夔牙
接響，顧有餘慚。孔翠羣翔，豈不多愧。下情拙目

每仁新奇耀然。親至。惜與已盡。曾目所發。商榷
玉振。克諧之義。甯比笙簧。思力所該。一至于此。
歎服吟研。周流戀念。昔時幼壯。頗愛斯文。含咀
之間。倏焉疲暮。不及後進。誠非一人。擅美推能。
實歸吾子。遲比閒日。清覲乃申。

報博士劉杳書

生平愛嗜。不在人中。林壑之懽。多與時奪。日暮
塗殫。此心往矣。猶復少存閒遠。徵懷清曠。結宇
東郊。匪云止息。政復頗寄風心。時得休偃。伸長

游居之地。休璉所述之美。望暮空深。何可髣髴。君愛素情多。惠以二贊。辭采妍富。事義畢舉。句韻之間。光影相照。便覺此地自然十倍。故知麗辭之益。其事弘多。輒當置之閣上。坐臥嗟覽。別卷諸篇。並爲名製。又山寺旣爲警策。諸賢從時復高奇。解頤愈疾。義兼乎此。遲比叙會。更共申折。

與約法師書

周中書風趣高奇。志託夷遠。真情素韻。水桂齊。

質自接彩同。栖年逾一紀。朝夕聯事。靡日暫違。
每受泚言休。逍遙寡務。何嘗不北茨游覽。南居
宴宿。春朝聽鳥。秋夜臨風。匪設空言。皆爲實事。
音容滿目。言笑在耳。宿草旣陳。楸檟將合。眷往
懷人。情不勝慟。此生篤信精深。甘此藿食。至于
歲時。包篚每見。請求凡厥菜品。必令以薦。弟子
輒靳而後與。用爲歡譁。其事未遠。其人已謝。昔
之諧調。倏成悲緒。去冬今歲。人鬼見分。石耳紫
菜。愴焉興想。淚下不禁。指遣恭送。以克蔬僧一

飯法師與周情期契濶非止恒交覽物存舊彌
當楚切痛矣如何往矣奈何弟子沈約和南

序

梁武帝集序

文思安安。欽明所以光宅。日月光華。南風所以興詠。日角之主。出自諸生。銳頂之君。少明古學。漢高宋武。雖闕章句。歌大風以還沛。好清談於暮年。夫成天地之大功。膺樂推之寶運。未或不文武兼資。能事斯畢者也。我皇誕縱。自天生知。在御清明。內發疏通。外典爰始。貴遊篤志。經術究淹。中之雅旨。盡曲臺之奧義。莫不因流極源。

披條振藻。若前疑往。滯舊學。罕通而超然直詣。
妙援終古。善發談端。精於持論。置壘難踰。摧鋒
莫擬。有同成誦。無假含毫。興絕節於高唱。振清
辭於蘭畹。至於春風秋月。送別望歸。皇王高宴。
心期促賞。莫不超挺睿興。濬發神衷。及登庸厯
試。辭翰繁蔚。牋記風動。表議雲飛。雕蟲小藝。無
累大道。懷君人之大德。有事君之小心。爲下奉
上。形於辭旨。雖密奏忠規。遺稟必削。而國謨藩
政。存者猶多。逮乎俯應歸運。仰修乾祿。載筆握

簡各有司存如綸之旨時或染翰暨於設簾靈
囿愷樂在鎬鹿鳴四牡皇華棠棣之歌伐木採
薇出車杖杜之譙皆詠志摘藻廣命羣臣上與
日月爭光下與鍾石比韻事同觀海義等窺天
觀之而不測遊之而不知者矣竊惟左史記言
右史記事君舉必書無論大小况乎感而後思
思而後積積而後滿滿而後言若斯而已哉謹
因事立名隨源編次

內典序

尚矣哉羣生之始也。義隱三藏之外。事非二乘
所窺。自並識同奔隨。緣受業。人天異軌。翺動殊
貫。苦樂翻回。愚智相襲。莫不宅火輪。騖擬燄。颺
遷。以寸陰之短晷。馳永劫之延路。精靈起伏。萬
緒千名。如來發源。恒品蓋亦含生之一。至於並
首爭馳。斯固未或異也。至於覆簣無始之初。成
功斷籌之末。塗遙業遠。妙軫遐長。累明積慧。靈
覺獨曉。巨相四八。照曜於大千。尊法二九。包籠
乎無外。六度之業。既深。十力之功。自遠。濟物以

權降魔匪力妙法輪轉甘露啓罪舟興六趣津
梁五道登四衢之長陌遊一乘之廣路斯旣已
事盈方等義滿神宣逮於大權協化對揚宗極
徇物兆於慈悲亡身著乎非已行符四等道昇
十地若乃靈性特達得自懷抱神功妙力無待
學成孤策獨鶩莫知所限結習紛綸一隨理悟
又有捐情屏慮身心靡欲厭生死之長勤眷寂
滅而投軫遙然自得漏累煙銷且津心適道功
非一業雖會理共源而萌情或異是故高心邈

行分路同趨忘懷屏欲殊塗一致或草礫身體
投骸林澤內亡形相外馴兕虎或坐臥行立迹
不違衆禪業定門造次無爽安忍與金石同固
戒行與寶珠等色雖秋禽年至春鮪時登而耿
介長蔬忡怛在念妙迹匪遐神塗密邇有悟必
通由之斯至故能藉智探虛乘心照理區區懷
抱融然靡執俱處三界獨與神遊包括四天卷
舒萬劫聞片議而陟道塲受一言而升彼岸長
夜未開心關自曉淹廻聖迹寢息神光旣負橐

以從師。亦棲林以綜業。足蹈慧門。學通龍藏。妙
吼遐徹。鸞音自遠。若夫。義跪運心。期誠匪迹。而
導達神功。照啓未悟。唱說之美。義兼在斯。暨九
土殊風。八方舛俗。遊化所包。事出弘獎。皆足以
遷光淨域。登儀寶地。並黜華剪飾。破愛辭親。鼓
棹無生之流。方軌俗表之路。固已千佛摩頂。七
住齊功。至夫清信士女。植緣曠劫。雖復容服未
改。而戒德內弘。瞻毗耶而聳轡。望波斯而迴軫。
駕四禪之眇眇。汎八解之悠悠。若乃十號尊崇。

三達靡礙、雖法身非有、而常住在躬、能仁權迹
四門、旣非悟道之始、假滅雙樹、甯有薪盡之窮、
而天人瞻慕、髣髴興情、雕金範玉、圖容寫狀、靈
儀炫日、寶刹臨雲、或役鬼神之功、或資髓腦之
力、製非人匠、寶以合成、莫不龍章八彩、瓊華九
色、至乃齒髮傳靈、衣履遺證、聖迹彪炳、日煥於
閭浮、神光陸離、星繁於淨刹、若乃乘此直心、推
誠闇往、則半息可追、一念斯至、感降參差、雲霏
霧委、此又招波象譯、輝映謙圖、夫秉牘書事、其

流已遠。蓋所以彪著往迹。煥述遺聲。鉅多。稽異
文。胡華舛則。至千叶暢心靈。抑揚訓義。固亦內
外同規。人神一揆。墳典邱索。域中之史策。本起
下生。方外之紀傳。統而爲言。未始或異也。而經
記繁廣。條流舛散。一事始末。表理卷分。或詞義
離斷。或文字互出。甫涉後條。已昧前覽。尋源討
流。未知攸適。雖精理瑩心。止乎句偈。而初悟始
學。致惑者多。且中外羣聖。咸載訓典。雖教有殊
門。而理無異趣。故真俗兩書。遞相扶獎。孔發其

端釋窮其致。撒網去綱。仁惠斯在。變民遷俗。宜以漸至。精粗抑引。各有由然。是故曲辨情靈。棲心妙典。伏膺空有之說。博綜兼忘之書。該括羣流。集成茲典。事以例分。義隨理合。功約悟廣。莫尚於斯。可以理求。證成妙果。若乃載司南之車。猶稱靡惑。服四照之草。得用不迷。况乎六馬同鑣。萬流共貫。日月經天。方斯未已。河海帶地。夫豈足云。蓋人道之筌蹄。羣生有悟於此也。

佛記序

含靈萬品。旣非記牒所窮。物物禀生。豈伊積塵
能計。莫不起乎無理。而至乎無生者也。雖要終
有地而原始。莫聞自非靈照特達。宗極斯在。則
理閉機初。鑽叩事絕。非唯四果不議。固亦十地
罔窺。邈乎悠負有之。而莫知所從者也。如來覆
簣爰始。言登末路。起滅廻還。馳驟不息。去來五
道。大千比之毫端。往復三界。祇劫未足稱遠。積
明累照。念念不休。離此生滅。證成妙果。固已空
有兼謝。豈徒齊遷魯變而已哉。旻昊區區。猶秉

何言之稱。至人無已。甯以詞義爲珍。蓋由萬感
相扇。昧明代起業假緣何事。須曉達。一音所吐。
無思不服。義在徇物。動非爲已。法吼震灑於無
外。甘露炳煥於龍宮。開宗闡教。致之有漸。標四
諦於鹿園。辨百非於雙樹。廓不二之法門。廣一
乘之長陌。行迷復路。弱喪知歸。而因應回舛。厥
塗不一。白毫所照。遍刹土於恒沙。七步降踐。壅
龍堆而攸被。推極神道。原本心靈。感之所召。跨
無邊而咫尺。緣之所垂。面法城而不覩。及像教

云未經紀東流熱地莫長寒山峻阻相尋石上
累萬方通剪葉成文重譯未曉自此迄今千祀
過半靈迹稍啓名僧間出律藏方等行來漸至
蘊乎西國未至者多雖法身常住之奧遠二諦
三假之淵曠悟道求宗於斯可足而能仁體茲
大聖寔爲本師悠悠羣品精靈所係迄于前因
往業多所昧畧然神化應感參差互見又世胄
名氏本國俗緣散析衆部卒難討究神功妙力
同出異名降胎求道甯止一相託生迦維本由

權迹出自北門，非悟法之始，遍照東方，豈通化
之極。適道已來，四十九載，妙應事多，宜加總緝，
共成區畛。至於經像舊錄，境刹遺記，開勸之功，
於斯自遠。大權弘曠，亡身以濟物，應真耿介，標
心非爲已分。蹤或異，適未必同。神塗詭互，難以
臆辨。靈怪倜儻，言語斯絕。圖澄之龍見，趙魏羅
什之鳳集，關輔犍陀近遊，京洛單開遠適。羅浮
雖迹與俗同，而意無可察。塗出玉門，法座不遠，
七處九會，峨然在目。靈應胖蠶，徧富延澤。以西

光景茂。多見天山之表。有志奇偉。每經邊厓。
神迹昭然。咸有文注。繁蕪舛雜。實須裁整。分五
道于人天。設重牢于厚地。各隨業力。的焉不差。
此皆卷舒真俗。終始名相。其玄塗幽遠。大則直
至道場。其微證切近。小則開勸。晚學斯寔兼濟
之方舟。大悲之廣路。雖復智昏視肉。形窮尺楮。
緣動必應。又況進于此者乎。是以至聖慇懃。每
存汲引。垂文見意。貽厥將來。皇帝行成無始。道
承曠切。十號在躬。三達靡礙。屈茲妙有。同此轉

流、傷、昏、愍、惑、久、迷、正、路、悱、發、之、徒、空、懷、鑽、仰、條、
流、緬、曠、事、難、總、一、志、淺、業、勞、迄、用、無、就、非、所、以、
闢、彼、四、衢、出、之、火、宅、者、也、乃、詔、中、書、侍、郎、虞、闡、
太、子、洗、馬、劉、漑、後、軍、記、室、周、捨、博、尋、經、藏、搜、採、
註、說、條、別、流、分、各、以、類、附、日、少、功、多、可、用、譬、此、
名、曰、佛、記、凡、三、十、篇、其、有、感、應、之、流、事、類、相、似、
止、取、其、一、餘、悉、不、書、或、後、死、而、更、生、陳、說、經、見、
事、涉、杳、冥、取、驗、無、所、亦、皆、靡、載、同、之、闕、疑、或、憑、
人、以、言、託、想、成、夢、尤、難、信、曉、一、無、所、錄、若、夫、欲、

遐適者必遠記所從欲悟道者必妙識所宗然後能允得其門親承音旨未有不知厥路莫辨伊人膠目闇踐自與理合所以引彼衆流歸之一源可令莘莘含識望塗知往案砥矢而言歸不迴遑於岐路俾厥清信之士亦有取於此云

約進啓云、佛記序今謹以上呈詞義無取伏懷自慙謹啓

基品序

奕之時義大矣哉體希微之趣含奇正之情靜則合道動必適變若夫入神造極之靈經武緯

文之德、故可與和樂等妙。上藝齊工、支公以爲
手談、王生謂之坐隱。是以漢魏名賢、高品間出。
晉宋盛士、逸思爭流。雖復理生於數、研求之所
不能涉、義出乎幾、爰象未之或盡。聖上聽朝之
餘、因日之暇、迴景紆情、降臨小道、以爲凝神之
性、難限、入玄之致、不窮。今撰錄名氏、隨品詳書
俾粹理深情、永垂芳於來葉。

論

七賢論

嵇生是上智之人、值無妄之日、神才高傑、故爲
世道所莫容、風邈挺持、蔭映于天下、言理吐論
一時所莫能參、屬馬氏執國、欲以智計傾皇祚
誅鉏勝已、靡或有遺、玄伯太初之徒、並出稽生
之流、咸已就戮、稽審於此時、非自免之運、若登
朝進仕、映邁當時、則受禍之速、過于旋踵、自非
霓裳羽帶、無用自全。故始以餌术黃精、終于假

塗託化。阮公才器宏廣，亦非衰世所容，但容貌
風神不及叔夜，求免世難，如爲有塗，若率其恒
儀，同物俯仰，邁羣獨秀，亦不爲二馬所安，故毀
行廢禮，以穢其德，崎嶇人世，僅然後全。仲容年
齒不查，不懸風力，麤可慕李文風，尚景而行之
彼稽阮二生，志存保已，旣託其迹，宜慢其形，慢
形之具，非酒莫可。故引滿終日，陶瓦盡年。酒之
爲用，非可獨酌，宜須用侶，然後成歡。劉伶酒性
旣深，子期又是飲客。山王二公，悅風而至，相與

莫逆把臂高林、徒得其遊、故於野澤、銜杯舉樽、
之致、寰中妙趣、固冥然不覩矣、自嵇阮之外、山
向五人、止是風流器度、不爲世匠所駭、且人本
含情、情性宜有所託、慰悅當年、蕭散懷抱、非五
人之與、其誰與哉、

辯聖論

聖人蓋人中之含、明德盡照、精粹凝玄者、或三
聖並時、或千載寂蔑、聖人遺情忘已、常以兼濟
爲念、若不登九五之位、則其道不行、非以黃屋

玉璽爲尊貴也。文王造周而未集，武王集之而未成。周公雖無王錄，而父兄二聖之烈，不可以不終。若非表以聖功，制禮作樂，則太平之基不著。二聖之美，不彰。孔子當無錄之運，值自晦之時，而云河不出圖，洛不出書，吾已矣。夫欲以聖德示天下，垂來世，當仲尼在世之時，世人不言爲聖人也。伐樹削迹于七十君，而不一值，或以爲東家邱，或以爲喪家犬。若不高歎鳳鳥，稱夢周公，樂正雅頌，各得其所，則當世安知其聖人。

乎

均聖論

自天地權輿、民生攸始、遐哉眇邈、無得而言焉。
無得而言、因有可言之象、至於太虛之空曠、無
始之杳茫、豈唯言象莫窺、良以心慮事絕、及天
地蕞爾來宅其中、毫端之泛巨海、方斯非譬、然
則有此天地已來、猶一念也、我之所久、莫過軒
羲、而天地之在彼太虛、猶軒羲之在彼天地、齟
齬之徒、唯謂赫胥爲遠、何其瑣瑣爲念之局邪、

世之有佛莫知其始前佛後佛其道不異法身
湛然各有應感感之所召跨大千而咫尺緣苟
未應雖踐跡而弗覩娑婆南界是曰閻浮葱嶺
以西經塗密邇緣運未開自與理隔何以言之
夏殷已前書傳簡寡周室受命經典備存象寄
狄鞮隨方受職重譯入貢總括要荒而八蠻五
狄莫不愚鄙文字靡識訓義不通咸納贄王府
登樂清廟西國密塗厥路非遠雖葉書橫字華
梵不同而深義妙理於焉自出唐虞三代不容

未有事獨西限道未東流豈非區區中國緣應
未啓求其會歸尋其旨要甯與四夷之樂同日
而語乎非爲姬公所遺蓋由斯法宜隱故也炎
昊之世未火未粒肉食皮衣仁惻之事弗萌懷
抱非肉非皮死亡立至雖復大聖殷勤思存救
免而身命是資理難頓奪寔宜導之以漸稍啓
其源故燧人火化變腥爲熟腥熟旣變蓋佛教
之萌兆也何者變腥爲熟其事漸難積此漸難
可以成著迄乎神農復垂汲引嘉穀肇播民用

粒食、歎腹克虛、非肉可飽、則全命減殺於事彌多、自此已降、矜護日廣、春蒐免其懷孕、夏苗取其害穀、秋獮冬狩、所害誠多、頓去之難已、備前說、周孔二聖、宗條稍廣、見其生不忍其死、聞其聲不食其肉、草木斬伐有時、麋卵不得妄犯、漁不竭澤、畋不燎原、鈞而不綱、弋不射宿、肉食蠶衣、皆須耆齒、牛羊犬豕、無故不殺、此則戒有五支、又開其一也、逮于酣醬、干酒滛迷、乎色詭妄、於人攘濫、自己外典所禁、無待釋教、四者犯人

人爲含靈之首。一者害獸。獸爲生品之末。上聖開宗。宜有次第。亦由佛戒殺人爲業最重也。內聖外聖。義均理一。而蔽理之徒。封著外教。以爲烹羊豢豕。理固宜然。惑者又云。若如釋氏之書。咸有緣報之業。則禹湯文武。並受剗剗。周公孔子。俱入鼎鑊。是何迷于見道。若斯之篤邪。試尋斯證。可以有悟矣。

答陶華陽

難云釋迦之現。近在莊王。唐虞夏殷。何必已有

周公不言恐由未出非門宜隱育王造塔始敬
王之世間浮有四則東國不容都無答曰釋迦
出世年月不可得知佛經旣無年厯注記此法
又未東流何以得知是周莊之時不過以春秋
魯莊七年四月辛卯恒星不見爲據三代年旣
不同不知外國用何曆法何因知魯莊之四月
是外國之四月乎若外國用周正邪則四月辛
卯長厯推是五日了非八日若用殷正邪周之
四月殷之三月用夏正邪周之四月夏之二月

都不與佛家四月八日同也。若以魯之四月爲證，則日月參差，不可爲定。若不以此爲證，則佛生年月，無證可尋。且釋迦初誕，唯空中自明，不云星辰不見也。瑞相又有日月星辰停住不行。又云明星出時墮地行七步，初無星辰不現之語。與春秋恒星不現意趣永乖。若育王造塔是敬王之世，閻浮有四，此道已流東國者，敬王已來，至於六國，記注繁密，曾無一槩。育王立塔，非敬王之時，又分明也。以此而推，則釋迦之興不

容在近周世公旦之情何得未有

難云夫子自以華禮興教何宜乃說夷法故歎
中國失禮求之四夷亦良有別意答曰弘教次
第前論已詳不復重辨

難云四夷之樂裁出要荒之際投諸四裔亦密
邇危羽之野禹跡所至不及河源越裳白雉尚
稱重譯則天竺尉賓久與上國殊絕衰周已後
時或有聞故鄒子以爲赤縣於宇內止是九州
中之一耳漢初長安乃有浮圖而經像眇昧張

騫雖將命大夏甘英遠届安息猶弗能宣譯。厥
教必其發夢帝庭乃稍興顯。此則似時有通礙。
非關運有起伏也。答曰。本以西域路近而大法
不被。此蓋由緣應未發。非謂其途爲遠也。其路
旣近而此法永不東流。若非緣應未至。何以致
此。及後東被。皆由緣應宜發通礙。各有其時。前
論已盡也。

難曰。若必以緣應有會。則昔之淳厚羣生何辜。
今之澆薄羣生何幸。假使斯法本以救澆者。夫

爲罪莫過於殺肉食之時殺孰甚焉而方俟火粒甫爲教萌於大慈神力不有所躓乎若杭糧未播殺事難息未審前時過去諸佛復以何法爲教此教之萌起在何佛兼四戒犯人爲報乍輕一殺害獸受對更重首輕未重亦爲未達夫立人之道曰仁與義周孔所云聞聲不食斬伐以時者蓋欲大明仁義之道于鳥獸草木尚曰其然況在乎人而可悖虐非謂內惕寡方意在緣報覩迹或似論情顧乖不審於內外兩聖其

事可得，是均以不此中參差難用頓悟謹備以
諮洗願具啓諸蔽答曰民資肉食而火粒未啓
便令不肉教豈得行前論言之已具不復重釋
衆生緣果所遭各有期會當昔佛教未被是其
惡業盛時後之聞法是其善業萌時善惡各有
其時何關淳厚之與澆薄五支之戒各有輕重
非殺戒偏重四支並輕且五業雖異而互相發
起犯人之戒人重故先出犯獸之戒獸輕故後
被訓戒之道次第宜然周公孔子漸弘仁惻前

論已詳、請息重辨、若必以釋教乖方、域之理外、此自一家之學、所不敢言、

究竟慈悲論

釋氏之教、義本慈悲、慈悲之要、全生爲重、恕已
因心、以身觀物、欲使抱識懷知之類、愛生忌死
之羣、各遂厥宜、得無遺失、而俗迷日久、淪惑難
變、革之一朝、則疑怪莫啓、設教立方、每由漸致、
又以情嗜所深、甘腴爲甚、嗜深于情、尤難頓革、
是故開設三淨、用伸權道、及涅槃後說、立言將

謂則大明隱恨則厥將來乃肉食蠶衣爲不
異害命天生事均理一滄蘭爛蛾非可忍之痛
懸庖登俎豈偏重之業而去取異情開抑殊典
尋波討源良有未達漁人獻鮪肉食同有其緣
泉妾登絲蠶衣共頌其分假手之義未殊通閉
之詳莫辯訪理求宗未知所適外典云五畝之
宅樹之以桑則五十者可以衣帛矣雞豚犬彘
勿失其時則七十者可以食肉矣然則五十九
年已前所衣宣布矣六十九年已前所食宜蔬

矣。輕煖於身，事既難遣，甘滋於口，又非易忘。對而爲言，非有優劣。宜泉麻果菜，事等義同。攘寒實腹，曾無一異。偏通繒纊，當有別途。請試言之。夫聖道隆深，非思不洽。仁被羣生，理無偏漏。拯麤去甚，教義斯急。繒衣肉食，非已則通。及晚說大典，弘宣妙訓，禁肉之旨，載現于言。黜繒之義，斷可知矣。而禁淨之始，猶通蠶革。蓋是敷說之儀，各有次第。亦猶闡提二義，俱在一經。兩說參差，各隨教立。若執前迷，後則闡提無人善之途。

禁淨通蠶則含生無頓免之望難者又以闢提
入道聞之後說蠶革宜禁曾無槩理大聖弘旨
義豈徒然夫常住密奧傳譯遐阻泥洹始度咸
謂已窮中出河西方知未盡關中晚說厥義彌
暢仰尋條流理非備足又按涅槃初說阿闍世
王大迦葉阿難三部徒衆獨不來至旣而二人
並來唯無迦葉迦葉佛大弟子不容不至而經
無至文理非備盡昔涅槃未啓十數年間廬阜
名僧已有蔬食者矣豈非乘心闇踐自與理合

者哉，且一朝裂帛，可以終年烹宰待膳，旦時引日，然則一歲八蠶，已驚其驟，終朝未肉，盡室驚嗟，拯危濟苦，先其所急，敷說次序，義實在斯，外聖又云，一人不耕，必有受其饑者，故一人躬稼，亦有受其飽焉，桑野漁川，事雖非已，炮肉裂繒，咸受其分，自涅槃東度，三肉罷緣，服膺至訓，操槩彌遠，促命有殫，長蔬靡倦，秋禽戛卵，比之如浮雲山毛，海錯事同於腐鼠，而繭衣纊服，曾不懷疑，此蓋慮窮於文字，思迷於弘旨，通方深信。

之客。庶有鑒於斯理。斯理一悟。行迷克反。斷蠶肉之因。固蔬泉之業。然則含生之類。幾於免矣。

形神論

凡人一念之時。七尺不復關所念之地。凡人一念聖人則無念不盡。聖人無已。七尺本自若空。以若空之七尺。總無不盡之萬念。故能與凡夫異也。凡人一念忘彼七尺之時。則目廢於視。足廢於踐。當其忘目忘足。與夫無目無足。亦何異哉。凡人之暫無。本實有無。未轉瞬有已。隨之念。

者哉、且一朝裂帛、可以終年烹牢待膳、旦時引
日、然則一歲八蠶、已驚其驟、終朝未肉、盡室驚
嗟、拯危濟苦、先其所急、敷說次序、義實在斯、外
聖又云、一人不耕、必有受其饑者、故一人躬稼、
亦有受其飽焉、桑野漁川、事雖非已、炮肉裂繒、
咸受其分、自涅槃東度、三肉罷緣、服膺至訓、操
槩彌遠、促命有殫、長蔬靡倦、秋禽戛卵、比之如
浮雲山毛、海錯事同於腐鼠、而繭衣纈服、曾不
懷疑、此蓋慮窮於文字、思迷於弘旨、通方深信

之客。庶有鑒於斯理。斯理一悟。行迷克反。斷齷肉之因。固蔬泉之業。然則含生之類。幾於免矣。

形神論

凡人一念之時。七尺不復關所念之地。凡人一念聖人則無念不盡。聖人無已。七尺本自若空。以若空之七尺。總無不盡之萬念。故能與凡夫異也。凡人一念忘彼七尺之時。則目廢於視。足廢於踐。當其忘目忘足。與夫無目無足。亦何異哉。凡人之暫無。本實有無。未轉瞬有已。隨之念。

與形乖，則暫忘；念與心謝，則復合。念在七尺之一處，則他處與異；人同，則與非我不異。但凡人之暫無其無，其無甚促；聖人長無其無，其無甚遠。凡之與聖，其路本同。一念而暫忘，則是凡品；萬念而都忘，則是大聖。以此爲言，則形神幾乎惑人。疑因果相主，毫分不爽。美惡之來，皆有定業。而六度所修，咸資力致。若修此力致，復有前因，因熟果成，自相感召，則力致之功，不復得立。六度所修，幾于廢矣。釋迦邁九劫勇猛，所成勇

猶之因定於無始、本不資九、安得稱劫、余以爲
因果情照、本是二物、先有情照、却有因果情照
旣動、而因果隨之、未有情照、因果何託、因識二
塗、用合本異、其本旣異、厥體不同、情照別起、於
理非礙、六度九劫、差不足疑也、

神不滅論

含生之類、識鑒相懸、等級參差、千累萬沓、昆蟲
則不逮飛禽、飛禽則不逮犬馬、曷明昭著、不得
謂之不然、人品以上、賢愚殊性、不相窺涉、不相

曉解燕北越南、未足云疋其愚者、則不辨菽麥、悖者、則不知愛敬、自斯已上、性識漸弘、班固九品、曾未繫其萬一、何者、賢之與愚、蓋由知與不知也、愚者所知、則少、賢者所知、則多、而萬物交加、羣方緬曠、情性曉昧、理趣深玄、由其塗、求其理、既有曉昧之異、遂成高下之差、自此相傾、品級彌峻、窮其原本、盡其宗極、互相推仰、應有所窮、其路既窮、無微不盡、又不得謂不然也、且五

情各有分、或耳目各有司、字必重、則形忘、目用

則耳廢何則情靈淺弱心慮雜擾一念而兼無
由可至既不能兼紛糾遞襲一念未成他端互
起互起衆端復同前矣不相兼之由由於淺惑
惑淺爲病病于滯有不淺不惑出于兼忘以此
兼忘得此兼照始自凡夫至於正覺始惑於不
兼不兼至能兼又謂不然也又昆蟲天促含靈
靡二或朝生夕殞或不識春秋自斯而進修短
不一既有其短豈得無長虛用損年善攝增壽
善而又善焉得無之又不得謂之不然也生既

可天則壽可無天既無矣則生不可極形神之
別斯既然矣形既可養神甯獨異神妙形麤較
然有辨養形可至不朽養神安得有窮養神不
窮不生不滅始末相較豈無其人自凡及聖含
靈義等但事有精麤故人有凡聖聖既長存在
凡獨滅本同末異義不經通大聖貽訓豈欺我
哉

難范縝神滅論

來論云形卽是神神卽是形又云人體是一故

神不得二、若如雅論此二物不得相離、則七竅百體、無處非神矣、七竅之用既異、百體所營不一、神亦隨事而應、則其名亦應隨事而改、神者對形之名、而形中之形、各有其用、則應神中之神亦應、各有其名矣、今舉形則有四肢百體之異、屈伸聽受之別、各有其名、各有其用、言神唯有一名、而用分百體、此深所未了也、若形與神對片不可差、何則、形之名多、神之名寡也、若如來論七尺之神、神則無處非形、形則無處非神、

矣。刀則唯刃。猶利。非刃則不受利名。故刀是舉體之稱。利是一處之目。刀之與利。既不同矣。形之與神。豈可妄合邪。又昔日之刀。今鑄爲劍。劍利卽是刀利。而刀形非劍形。於利之用。弗改而質之形已移。與夫前生爲甲。後生爲丙。夫人之道。或異。往識之神。猶傳。與夫劍之爲刀。刀之爲劍。有何異哉。又一刀之質。分爲二刀。形已分矣。而各有其爲。今取一半之身。而剖之。爲兩。則飲齧之生。卽謝任重之爲。不分。又何得以刀之爲

利譬形之與神邪、來論謂刀之與利、卽形之有
神、刀則舉體是一利形、則舉體是一神、神用於
體、則有耳目手足之別、手之用不爲足用、耳之
用不爲眼用、而利之爲用無所不可、亦可斷蛟
蛇、亦可截鴻鴈、非一處偏、可割東陵之瓜、一處
偏、可割南山之竹、若謂利之爲用、亦可得分、則
足可以執物、眼可以聽聲矣、若謂刀背亦有利、
兩邊亦有利、但未鍛而銛之耳、利若遍施四方、
則利體無處復立、形方形直、並不得施利、利之

爲用、正存一邊毫毛處耳、神之與形、舉體若合、
又安得同乎、刀若舉體是利、神用隨體則分、若
使刀之與利、其理若一、則脾下亦可安眼、背上
亦可施鼻、可乎、不可也、若以此譬爲盡邪、則不
盡、若謂本不盡邪、則不可以爲譬也、若形卽是
神、神卽是形、二者相資、理無偏謝、則神亡之日、
形亦應消、而今有知之神亡、無知之形在、此則
神本非形、形本非神、又不可得強令如一也、若
謂總百體之質、謂之形、總百體之用、謂之神、今

百體各有其分。則眼是眼形。耳是耳形。眼形非耳形。耳形非眼形。則神亦隨百體而分。則眼有眼神。耳有耳神。耳神非眼神。眼神非耳神也。而偏枯之體。其半已謝。已謝之半。事同木石。譬彼僵尸。永年不朽。此半同滅。半神旣滅。半體猶存。形神俱謝。彌所駭惕。若夫二負之尸。經億載而不毀。單開之體。尚餘質於羅浮。神形若合。則此二士不應神滅而形存也。來論又云。歟而生者。歟而滅者。漸而生者。漸而滅者。請借子之衝以

攻子之城漸而滅謂死者之形骸始乎無知而至于朽爛也若然則形之與神本爲一物形旣病矣神亦告病形旣謝矣神亦云謝漸之爲用應與形俱形以始亡未朽爲漸神獨不得以始末爲漸邪來論又云生者之形骸變爲死者之骨骼按如來論生之神明生之形骸旣化爲骨骼矣則生之神明獨不隨形而化乎若附形而化則應與形同體若形骸卽是骨骼則死之神明不得異生之神明矣向所謂死定自未死也

若形骸非骨骼則生神化爲死神生神化爲死
神卽是三世安謂其不滅哉神若隨形形旣無
知矣形旣無知神本無質無知便是神亡神亡
而形在又不經通若形雖無知神尚有知形神
旣不得異則向之死形翻復非枯木矣

述僧設會論

夫修營法事必有其理今世召請衆僧止設一
會當由佛在世時常受人請以此擬像故也而
佛昔在世佛與衆僧伽藍內本不自營其食

具也。至時持鉢往福衆生。今之僧衆。非唯持中者少。乃有腆恣甘腴。厨膳豐豪者。今有加請召。並不得已。而後來以滋腴之口。進蔬菽之具。延頸感頽。固不能甘。旣非樂受。不容設福。非若在昔。不得自營。非資四輩。身口無託者也。此以求福。不其反乎。篤而論之。其義不爾。何者。出家之人。本資行乞。戒律曷然。無許自立厨帳。并畜淨人者也。今旣取足寺內。行乞事斷。或有持鉢到門。便呼爲僧徒。鄙事下劣。旣是衆所鄙恥。莫復

行乞悠悠後進求理者寡便謂乞食之業不可
復行白淨王子轉輪之貴持鉢行詣以福施者
豈不及千載之外凡庸沙門躬命僕豎自營口
腹者乎今之請僧一會既可髣像行乞行乞受
請二事不殊若以今不復行乞又不請召則行
乞求法于此永冥此法旣冥則僧非佛種佛種
旣離則三寶墜于地矣今之爲會者宜追想在
昔四十九年佛率比丘入城乞食威儀舉止動
目應心以此求道道其焉遑若以此運心則爲

會可矣

述僧中食論

人所以不得道者由於心神昏惑，心神所以昏惑，由於外物擾之。擾之大者，其事有三：一則勢利榮名，二則妖妍靡曼，三則甘旨肥濃。榮名雖日用於心，要無晷刻之累；妖妍靡曼，方之已深，甘旨肥濃，爲累甚切。萬事云云，皆三者之枝葉耳。聖人知不斷此三事，求道無從可得，不得不爲之立法，使簡而易從也。若直云三事惑本，並

宜禁絕而此三事是人情所甚惑念慮所難遣雖有禁約之旨事難卒從譬於方舟濟河豈不欲直至彼岸河流既急會無直濟之理不得不從流邪靡久而獲至非不願速事難故也禁此三事宜有其端何則食之於人不可頓息其於情性所累莫甚故推此晚食併置中前自中之後清虛無事因此無事念慮得簡在始未專在久自習於是束以八支紆以禁戒靡曼之欲無由得前榮名衆累稍隨事遣故云往古諸佛過

中不餐此蓋是遣累之筌蹄適道之捷徑而或
咸謂止於不食此乃迷于向方不知厥路者也

義

佛知不異衆生知義

佛者覺也覺者知也凡夫之與佛地立善知惡未始不同也但佛地所知者得善之正路凡夫所知者失善之邪路凡夫得正路之知與佛之知不異也正謂以所善非善故失正路耳故知凡夫之知與佛之知不異由於所知之事異知不異也凡夫之所知不謂所知非善在干求善而至於不善若積此求善之心會得歸善之路

或得路則至于佛也、此衆生之爲佛性、是在其知性常傳也

六道相續作佛義

一切種智與五道六趣衆生、共有受知之分、無分異也、問曰、受知非知邪、答曰、非也、問此以何爲體、答曰、相續不滅是也、相續不滅、所以能受知、若今生陶練之功漸積、則來果所識之理轉精、轉精之知來應、以至於佛、而不斷不絕也、若今生無明、則來果所識轉闇、轉闇之知亦來應

以至於六趣也。受知之具隨緣受知，知之美惡不關此受知之具也。問曰：知非知，既聞命矣，受知受知，自是相續不滅。知自然因緣中來，與此受知之具從理而相關。答曰：有此相續不滅，自然因果中來，有因有果，何得無美無惡乎？

因緣義

凡含靈之性，莫不樂生，求生之路，參差不一，一爾流遷，塗徑各異，一念之間，衆緣互起，一因果內有差忒，好生之性，萬品斯同，自然所稟，非

由緣立、固知樂生非、因緣、因緣非樂生也、雖然、
復俱宅形骸、而各是一物一念、旣召衆緣、衆緣
谷隨念起、善惡二念、誠有不同、俱資外助、事由
一揆、譬諸非水非土、穀芽不生、因緣性識、其本
旣異、因果不惑、雖則必然、善惡獨起、亦有受礙、
雖云獨起、起便成因、內因外緣、實由乎此也、

頌

千佛頌

道有偕適理無二歸照寂同是形相俱非千覺
俯應遞叩冥機七尊緬矣感謝先達旣過已滅
未來無像一刹靡停三念齊徃不常不住非今
非曩賢劫雖遼倏焉如響栖林藉樹背室違家
前佛後佛迹罔隆宓或遊堅固或蔭龍華能達
斯旨可類恒沙牲牲羣有均此妙極先晚參差
各願隨力密跡弘道數終乃陟誓覩來運永傳

今識

朝丹徒故宮頌

聖祖神傑堯蹤漢烈岳峻雄圖天張武節墜命
既升霸畧將騁清渭走烽濁河獻警恃峭劍關
憑深桂嶺燹章委闕禮樂沈河拯壓傾構引溺
危波盡物稱瑞窮靈委和玄精翼日丹羽巢阿

贊

高士贊

有序

余之所謂高士者，悠悠皆是。請試言之。聖人蒞天下，則賢人贊務。禹益皋陶是也。自中智以下，莫不有學，以從政佐國安民者也。易曰：聖人之大寶曰位，非學則不得也。學所以行其志。孝弟慈仁信義是也。雖誦先王之典謨，而不行其志，聖人之大寶亦不可得也。要須學行兼有，然後取之。悠悠之徒，莫不攘袂而議進取，怒目而爭。

權利悅愚諂闇。苟得忘廉。若斯人者。豈入國士之塗。動衣冠之眄。藉此而登高位。未或有也。贊曰。

亦有哲人。獨執高志。避世避言。不友不事。恥從汙祿。靡惑守餌。心安藜藿。口絕炮鼈。取足落毛。甯懷組織如金。在沙顯然自異。猶玉在泥。涅而不緇。身標遠迹。名重前記。有美高尚。處知若無。劣哉羣品。事靜心驅。苟能立志。爭此匹夫。進忘隕穫。退守恬愉。曰仁與義。其徑不迂。爲之則至。

非物所拘宦成名立陟彼高衢

繡像題贊

有序

維齊永明四年歲次丙寅秋八月己未朔二日
庚申第三皇孫所生陳夫人含微宅理炳慧臨
空結言寶位騰心淨覺敬因樂林寺主比丘尼
釋寶願造繡無量壽尊像一軀乃爲讚曰

表相異儀傳形匪壹鏤玉圖光雕金寫質亦有
淑人含芳上律絢發綺情幽摛寶術縟文內炳
靈姿外溢水耀金沙樹羅瓊實現符淨果來膺

妙秩毓藻震閭騰華梵室有億斯年於萬茲日

彌勒贊

乘教本一法門不二鄴基累明功由積地耿耿
長津遙遙遐轡道有常尊神無恒器脫屣王家
來承寶位慧日晨開香雨宵墜藉感必從憑緣
斯至曰我聖儲儀天作貳尚想龍柯瞻言思媚
鐫石圖徽雕金寫秘望極齊工舉光等邃超矣
福臻融然理備敬勒玄蹤式傳遐懿

銷聲贊

寂矣栖魂，非海非樊，若人焉往，其理空存。天標已暖，絕羽孤騫，堯逢豈讓，札值奚言。

雪贊

火競乃上炎，陰矯亦下潤，獨有凝雨姿，貞晄而無殉。排雲甯自高，晞光本非恡，委谷不辭深，因巖豈知峻。潔貌雖同賞，英心其誰振。

銘

瑞石像銘

并序

夫靈應微遠無跡可追心路照通有感斯順我
皇體神御極挹睿臨乾幽顯成表無思不服若
夫二儀叶德五精翼化下洞淵泉上達蒼昊天
無息瑞地不降祥十住髣髴於林衡應真胖蠻
於清夜素毫月舉騰光於梵室妙趾神行布武
於椒殿至於事符緇牒旣表禎圖無不雲霏霧
委盈簡被策莫黑三距眇千齡而再現曷露瀉

腴望鳳蓋而沾陛此皆舜日未書堯年罕降豈
直朱鳥動色立柜相趣而已哉嘉玉遠自北戎
梁弱水而委質潤徹環竒曠世之所不覩白金
近發東山剖幽巖而啓瑞傍被崖巖鴻靈之所
未刊雖復素環之絕貺燭銀之瑤寶方斯茂如
也若夫金石具剛非游泳之質自非霈德潛衍
感極迴靈豈變堅沈之體顯輕浮之相維永明
七年某月爰有祥石眇發天津浮海因潮翻流
迴至表異浙河獻竒禁圃瓊瑜等潤精金比色

帝上眷幽關之易啓、咨玄應之無方、雖拊事寂寥、而因心咫尺、愛其貞恒之性、嘉其可久之姿、莫若圖妙像於檀香、寫遺影於祇樹、乃詔名工、是鐫是琢、靈相瑞華、煥同神造、至於雕削之餘、遺刊委斷、方圓小大、觸水斯沈、駐罕停蹕、親加臨試、良由法身是託、不溺沈弱之淵、剖析旣離、方須浮金之水、至矣哉、禎符若斯之妙也、敢銘寶貺、永福天人、其詞曰

遙哉上覺曠矣神功、四禪無像、三達皆空、表靈

降世演露開蒙惟聖仁宇寶化潛融道非迹應
事以感通沈精浮質遠自河葱悠悠亘水眇眇
因風泛彼遼碣瑞我國東有符皇德乃眷宸衷
永言驚室栖誠梵宮載雕載範寫好摘工藉茲
妙力祚闡業隆冕旒南面比壽華嵩

光宅寺刹下銘

并序

光宅寺蓋上帝之故居行宮之舊兆楊州丹陽
郡稜陵縣某鄉某里之地自去茲邠亳來儀京
輔拓宇東第咫尺武城闡聖心留愛閑素遷負南

郭義等去，鄴事均徙鎬。及尅濟橫流，膺斯寶運。命帝闢以廣闢，卽太微而爲宇。旣等漢高流連於豐沛，亦同光武眷戀於南陽。思所以永流聖迹，垂之不朽。令事與須彌等固，理與天地無窮。莫若光建寶塔，式傳於後。乃以大梁之天監六年歲次星紀，月旅黃鍾，閏十月二十三日戊寅，仲冬之節也。乃樹剎立壤表，峻蒼雲下洞淵泉。仰迫星漢，方當銷巨石於賢劫。拯未來於忍上。若夫朱光所耀，彤雲所臨。非止天眷兼因地德。

皇帝乃啓扉闔闔造舟淮涘接神飈而動驂越
浮梁而逕度芝蓋容與翠華歲蕤下輦停蹕躬
展誠敬廣集四部揆景同蔬弘此廣因被之無
外同由厥路俱至道場乃作銘曰

八維悠濶九服荒茫靈聖底止咸表厥祥壽邱
諛諛電繞樞光周原膺膺五緯入房自茲遐負
在處弗亡安知若水甯辨窮桑自天攸縱於我
惟皇卽基昔兆爲世舟航重檐累構迴剎高驤
土爲淨國地卽金牀因斯太極溥被翺翔豈徒

三界甯止十方，濡足萬古，援手百王，一念斯答，
萬壽無疆，如日之久，如天之長。

彌陀佛銘

法身無象，常住非形，理空反應，智滅爲靈，窮寂
震響，大夜開冥，眇哉遐壽，非歲非齡，物愛彫彩，
人榮寶飾，事儉欲興，情克累息，至矣淵聖，流仁
動惻，順彼世心，成茲願力，於惟淨土，旣麗且莊，
琪路異色，林沼焜煌，靡胎靡娠，化自餘方，託生
在焉，紫帶青房，眷言安養，興言遐適，報路雖長，

由心咫尺、幽誠曷寄、刊靈表跡、髣髴尊儀、圖金
寫石、灑沱玉沙、乍來乍往、玲瓏寶樹、因風韻響、
願遊彼國、晨翹暮想、七珍非羨、三達斯仰、

釋迦文佛像銘

積智成朗、積因成業、能仁爽感、將吼妙法、駐景
上天、降生右脇、始出四門、終超九劫、耿求靈性、
曠追玄軫、道雖有門、跡無可朕、物我兼謝、心行
同泯、一去後心、百非甯盡、式資理悟、悟以言陳、
言不自布、出之者身、有來必應、如泥在鈞、形酬

響答、且物且人、應我以形、而余朦瞶、守茲大夜、
焉拔斯苦、仰尋靈相、法言攸吐、不有尊儀、夢焉
誰覩、

栖禪精舍銘

有序

此寺征西蔡公所立、昔厠番麾、預班經創之始、
今重遊踐、鑒舊興懷、故爲此銘、以傳芳迹、

巖靈旅逸、地遠栖禪、蘭房葺蕙、嶠薨架煙、南瞻
巫野、北望淮天、遙哉林澤、曠矣江田、空心觀寂、
慧相涓筌、眷惟斯踐、愴屬遐年、游仁厠遠、宅賞

憑旃頌創神苑陪構靈椽瞻禁拓園望鷺疏山
製石調響栖理凝玄曠移羽旆眇別松泉委組
東國化景西蓮巒陽夷改蓬籜粗遷重依漢遠
復逐旌懸往辭妙幄今承梵筵八翻海鶴九噪
巖蟬珮華長掩懋迹空傳式籍雲拱敢告祥緣

